

欽定盛京通志卷之七十八

國朝人物 十四

正白旗漢軍

正紅旗漢軍

欽定盛京通志

卷七十八

目錄

一

欽定盛京通志卷之七十八

國朝人物 十四

正白旗漢軍

石廷柱。隸正白旗漢軍。先世為遼東武弁。父翰始家焉。兄弟三人。長國柱。次天柱。次即廷柱。天命七年來歸。國柱、天柱俱積軍功至副將。廷柱當

太祖初。命在文館任事。授三等輕車都尉。世職。十一年從征夔努克。取其中寨。晉二等男。天聰三年。率

欽定盛京通志 卷七十八 國朝人物十四

兵勦明故將毛文龍所屬諸島。有俘獲。四年。收復漢兒莊。率其城將士來謁。五年。圍大凌河城。諭降祖大壽。六年。從征察哈爾。七年。隨攻旅順口。以功晉三等子。世職。崇德元年。

太宗御演武場。以廷柱軍容整肅。賚之。二年。以廷柱為漢軍左翼都統。四年。戰松山。屢破敵兵。六年。陳取錦州策。

太宗嘉納之。再圍松山。乘夜破敵。晉爵二等子。七年。分漢軍為八旗。以廷柱為鑲紅旗都統。順治元年。

從入關。平定山東。山西。河南。累以戰功。加至一等伯。十二年。以鎮海將軍。鎮京口。戢和兵民。百姓安堵。有石佛之稱。十四年。乞休。加少保。兼太子太保。致仕。尋卒。

賜祭葬。謚忠勇。子六人。華善。琳。珍。俱知名。華善官至將軍。防守鎮江。歿後。鎮江人思其德。建祠立碑。華善子文炳。仕至杭州副都統。亦有政績。

和濟格爾。蒙古烏魯特人。隸正白旗漢軍。天命七年。大軍圍廣寧城。偕守備石廷柱來歸。授叅

領。十一年。從征囊努克棟奎。皆有功。天聰三年。偵明兵于薊州。五年。敗大凌河城援兵。斷其樵採。崇德三年。從征明。至山東。屢戰皆捷。五年。擊破松山步兵。杏山騎兵。六年。明總督洪承疇援錦州。駐軍松山。一再犯我師。復自松山分踞高橋三臺。和濟格爾力戰敗之。七年。攻克塔山。杏山。二城。累功授騎都尉。加一雲騎尉。先是分漢軍爲四旗。以和濟格爾爲鑲白旗副都統。至是分爲八旗。改正白旗副都統。遂爲漢軍正白旗。

人。八年從攻寧遠。克中後所前屯衛二城。順治元年。晉世職爲三等輕車都尉。三年卒。子巴圖襲。

徐大貴。隸正白旗漢軍。初任佐領。兼工部理事官。崇德五年。從圍錦州。屢敗松山。杏山。援兵。是時明總督洪承疇。駐軍松山。分兵踞高橋南三臺。大貴攻克之。旣而明兵千餘。乘夜犯我營。率所部力戰。斬二十餘級。七年。從克塔山。杏山。二城。授雲騎尉。世職。八年。從克中後所前屯衛。一

城。晉世職爲騎都尉。順治元年。擢副都統。從征山西。定太原。剿流賊李自成於延安。大破之。二年。從豫親王多鐸。平定河南。江南。晉三等輕車都尉。三年。遷刑部侍郎。兼副都統如故。七年。駐防杭州。九年。偕平南將軍金礦。剿閩賊鄭成功。時成功居海澄。以衆二十餘萬寇漳州。大貴督兵進擊。殲賊三萬餘。遂攻海澄。賊扼隘拒戰。連破之。晉世職至一等輕車都尉。加一雲騎尉。十二年。晉爵三等男。先是明魯王朱以海據舟山。

既敗走依成功。成功乘其赴南澳遣人沉之海。而其諸將阮思陳六御等願留為成功用。及是思等引眾陷舟山。大貴從大將軍伊勒德征之。十三年進兵定海。思等以戰艦二百餘迎戰。敗之望江。再敗之衡水洋。思六御授首。遂復舟山。十四年引疾乞休。加太子少保致仕。尋敘復舟山功。晉爵二等男。康熙十八年卒。

賜祭葬諡勤果

馬國柱遼陽人。隸正白旗漢軍。天聰八年舉人。

欽定盛京通志

卷七十八

國朝人物十四

四

入直內院。崇德三年授都察院理事官。順治元年巡撫山西。時甫平大同忻代太原。遂以次定汾州平陽潞安澤州。胥安輯之。而境內土賊蠡起。乃馘閻汝龍於陽曲。降高九英於嵐縣。勦梁自雨李俊於交城陽曲。山西悉平。擢宣大總督。遷江南江西河南總督。檄兵會侍郎鄂屯。俘斬安慶土賊馮洪圖。及其黨蔣懋修鍾武。會江西總兵金聲桓據南昌叛。賊將潘永禧突犯徽州。遣官兵擊卻之。復遣副將楊捷等克復都昌。擒

偽尚書余應桂。乘勝搗武寧。擊敗賊黨鄧雲龍等。未幾。廣東叛將李成棟犯贛州。大破其衆。而聲桓已爲大軍所蹙。赴水死。江西悉平。是時江北諸賊依山結寨。詭以奉明宗室爲名。時出劫掠。國柱遣副將朱運亨等擊英山賊陳元。破之。於三尖山。檄總兵卜從善。剿白雲梅家英窠。諸寨。偽石城王朱統錡。糾賊五千餘。由金紫寨赴援擊郤之。乘勝連破賊寨。擒偽總兵孔文燦。偽副將方學達等。復督兵會提督巴山張大猷。剿

六安州賊陣。斬其渠張福寰。侯應龍。降其黨王俊籍。維倫等。江北悉平。先是。偽國公張名振。奉明魯王朱以海。竄舟山。偽侯吳凱。踞大蘭山。助之。國柱寓書招凱。凱與偽伯顧奇勳。偽將軍姜君獻。偽總兵陳德芝等來降。名振勢遂孤。蓋順治六年事也。是年秋。江南河南州縣。雨雹傷稼。請履勘蠲卹之。復請改南京國子監爲江寧府學。並報可。九年。福建賊張自盛。竄入江西。大覺巖。檄提督劉光弼。會閩兵大剿。自盛就擒。十一

年名振由海道屢犯崇明。劉河吳淞遣總兵王璟副將張思達等率水師分擊之。連敗賊於靖江。泰興燬其船。名振遠遁入海。尋湖廣賊賴龍等犯江西。國柱與湖廣總督祖澤遠會師搗其巢於桂東。獲賴龍等。斬之。累加太子太保。以年老致仕。康熙三年二月卒。

賜祭葬如例。祀江南山西名宦。

宜永貴。遼陽人。隸正白旗漢軍。任佐領。兼叅領。崇德五年。從圍錦州。以礮攻克涼馬山等處。六

年復圍錦州。戰松山。克高橋南三臺。七年。以礮克塔山附近諸臺。及其城。敘功。授雲騎尉。世職。八年。攻克中後所。前屯衛二城。晉騎都尉。順治元年。任兵部理事官。二年。從征南河。追敗賊於潼關。又從征江南。進克揚州。破敵戰艦。斬馘無算。六年。爲臨清總兵。大破土賊杜全。張文齊等。於朝城。濮州。皆授首。九年。任都統。尋授倉場侍郎。晉世職。一等輕車都尉。十一年。授南贛巡撫。攻僞都督許勝可。兵於羅漢岩。擒斬之。十三年。

調福建。會海寇鄭成功率衆猝犯福州。薄城下。時官兵俱赴漳泉。德化。永春。城守單弱。永貴力疾登陴拒守。乘間出城。斬俘不可勝計。賊鋒頓挫。一月圍解。康熙四年。致仕。尋卒。

賜祭葬如例。以追敘福州全城功。加至三等男。

蔡士英。錦州人。隸正白旗漢軍。順治元年。以佐領從入關。勦山東土賊康玉環。及招撫山西。攻克太原。皆有功。三年。隨征浙江。定福建。六年。征叛鎮姜瓖。復朔州。及汾州府。九年。以右副都御

欽定盛京通志

卷七十八

國朝人物十四

七

史巡撫江西。勦廣信土賊楊文。吉安土賊劉京等。悉平之。士英奏請豁江西勘實荒田。免逋賦五十八萬有奇。免缺丁五十九萬有奇。又請減瑞州浮糧十萬餘石。袁州糧率每畝浮一斗六升有奇。士英請減之。視新喻九斗三合爲定額。以蘇積困。疏上。皆報可。民甚德之。十二年。晉淮安漕運總督。興利除弊。遠近悅服。晉兵部尙書。康熙四年卒。

賜祭葬。諡襄敏。祀江西淮安名宦。所著有撫江集。督漕

奏議。

于時躍。廣寧人。隸正白旗漢軍。順治二年。任江
南合肥令。遷河南懷慶守。擢分守河南南道。勦土
賊劉芳等。平之。八年。任陝西按察使。聽斷明允。
案無積牘。一時有于不落店之謠。駐防兵擾民。
時躍一繩以法。馭吏尤嚴。所屬無敢受賕者。十
年。巡撫廣西。時李定國等擁朱由榔。尙盤據雲
貴。朱盛濃等應之。時躍至。斬賊無算。陣擒盛濃。
十四年。孫可望降。定國竄入雲南。南寧。太平等
六郡。尙爲賊黨所據。時躍籌兵畫餉。親督師進
勦。六郡以平。十八年。擢廣西總督。僞德陽王朱
至濬竄入安南。時躍遣使招撫。至濬等投誠。加
都察院右都御史。康熙二年。卒於官。

賜祭葬如例。祀廣西名宦。

夏一鶚。奉天人。隸正白旗漢軍。順治三年。知江
南常州府。時山湖藪澤。尙多伏莽。一鶚悉心勞
來。威惠並著。盜賊皆爲良民。尋轉江寧知府。及
江西分守道。八年。授江西巡撫。江右境土初定。

政多穢濁。土地荒蕪。一鶚劾劾貪吏二十餘員。吏治澄肅。清釐錢糧戶口。招集流亡。開墾荒地。給還官產。安插明朝廢冢。期年。政務具舉。明翰林傅鼎銓等受僞職。聚衆爲亂。往來福建。江西。一鶚調兵分路夾擊。追至福建。斬級萬餘。生擒鼎銓。并僞總兵楊起龍等。又九仙山賊首陳九思。宜黃賊首曾明等。負固山寨。出沒爲寇。一鶚勦撫兼用。分地設防。賊黨先後就戮。境土悉安。嗣卒。康熙十七年。崇祀江西名宦祠。

閔三元。隸正白旗漢軍。世居錦州。順治初。隨入關。五年。授河南鹿邑令。爲人廉明。有才畧。時邑新墾。糧多詭寄。力爲釐正。由是賦役均而國課增。官署學宮。皆毀于兵燹。三元一一創立。規度稍備。鹿邑自黃水汜濫後。舊溝淤壞。三元徧閱境內。相其高下。詢覽舊跡。共開渠增培。使瀦水之區。悉達于河。邑北枕渦河爲患。三元增築堤防。俾永無衝決。在任五年。百廢具舉。及去任。士民遮道攀留。立碑以記。卒祀名宦。

金培生。奉天人。隸正白旗漢軍。順治初。任陝之潼關道。時關中寇亂初定。民未安集。草竊乘時。聞發。培生盡心撫輯。築城浚隍。興教化。勵風俗。嚴保甲。勸開墾。著有治績。民懷其惠。及卒。入祀名宦。

遲日巽。廣寧人。隸正白旗漢軍。順治七年。知山西解州之夏縣。時叛鎮姜瓖餘孽。猶潛伏山林。日巽募練鄉勇。躬往督戰。悉就撲滅。脅從者赦之。俾得復業。又力請蠲積逋。減役省徭。夏人始

蘇

崔宗泰。奉天人。隸正白旗漢軍。順治十二年。知江南常州府。惠貧弱。抑豪強。發摘奸伏。吏民驚若神明。十三年。大軍征閩。駐郡時。有遊騎逐婦女二人。溺死。宗泰卽白諸將軍。按法治之。麾下肅然。民得安堵。卒祀名宦。

石文晟。奉天人。隸正白旗漢軍。康熙中。知山西平陽府。時值歲饑。方有造船運米諸役。上官又令民輸草三十五萬束于大同。文晟請就近收

買罷其役。又言賑饑煮粥止便少壯能就食者。老病婦孺仍不免坐斃。請散賑官親歷山僻按戶給之。全活無算。康熙三十三年巡撫雲南。豁達多才畧。爲政務舉大綱。先是雲南屯賦仍前明舊額。科重賦繁。軍民病之。文晟疏請減十之六。又請增鄉試解額。以振起人文。士民無不感戴。及調廣東巡撫。尤多惠政。粵人思其德。卒祀名宦。

于翔漢。奉天人。隸正白旗漢軍。康熙十三年知

陝之隴州。先是逆藩吳三桂遣僞將蔡元攻隴州。前官翁世庸被執。城隨陷。未幾大軍克復隴州。賊西遁。復遶關山頂。塞路守險。總督哈占等率兵屯咸宜關。相持不下。翔漢供億彌年。軍輸無闕。人民安堵。擢鳳翔知府。休養瘡痍。人賴以安。

蔡毓榮。士英子。隸正白旗漢軍。康熙十九年授綏遠將軍。同諸軍恢復雲南。賊平後。改授雲貴總督。時逆氛初靖。流離載途。毓榮招撫散亡。給

牛種。勸耕作。流民漸復業。奏上等滇十疏。設施各有條理。滇人德之。

余三級。隸正白旗漢軍。世居遼東。初任湖北黃州府同知。轉武昌守。秉公持正。脩舉百務。才能肆應。事集而民不病。歷任山東按察使。尤廉明平允。不徇情。不枉斷。及轉廣東布政使。清操彌著。公署中。饘粥宴如也。卒祀湖廣名宦。

蔡毓秀。奉天人。隸正白旗漢軍。康熙十六年。知浙之奉化縣。值歲暮。鄉民以逋課滯獄者數十

人。悉放還家。約以新正完課。民感泣如約。邑有盜魁二人。行劫橫州里。毓秀擒磔於市。積匪斂迹。請免運衆協兵米。民累得甦。輿誦德之。

遲維坤。廣寧人。隸正白旗漢軍。康熙十九年。知山東聊城縣。寬嚴皆中節。公暇。卽詣隴畝。勸民力作。兼諮訪時事。長幼皆得盡言。故所興革。皆切中利弊。闔邑大治。尋卒於官。祀名宦。

楊宗仁。奉天人。隸正白旗漢軍。康熙中。由甘肅階州知州。遷臨洮同知。監蘭州鎮遠橋商稅。正

額外一無羨餘。值歲歉。請發倉賑饑。減稅額。招流亡。上官有疑獄。輒付宗仁。一訊卽決。郡多盜。有老爪賊尤爲民害。因讞他獄。得百餘案。皆窮治。捕置諸法。盜風頓息。

滕天綬。遼陽人。隸正白旗漢軍。康熙二十五年。知陝之漢中府。諳練精敏。公庭清暇。嘗言政以富教爲本。爰修復廟學倉廩。俾民知務本。漢南素繞水利。天綬相視地形。築堤建閘。啓閉有期。蓄洩有界。自是爭端永杜。灌溉之利。垂諸永久。卒。祀漢中府名宦。

欽定盛京通志

卷七十八

國朝人物十四

十三

董學詩。遼陽人。隸正白旗漢軍。康熙二十六年。知山西懷仁縣。年少精敏。待士撫民。咸得治體。在任三年。治行爲當時最。

劉民瞻。隸正白旗漢軍。康熙二十八年。知山西沁州。值歲荒。設法賑救。全活無算。陞平陽府同知。累陞至直隸正定知府。并著賢聲。後崇祀沁州名宦。

羅文瑜。隸正白旗漢軍。世居廣寧。順治乙未進

士授山東曹縣令。弱冠蒞任。卽能發奸摘伏。奸宄潛踪。待士和而有禮。御下寬而不縱。時丈量官地。立法詳密。弊清而人不擾。尋擢濟南守。卒祀曹縣名宦。

羅文現。隸正白旗漢軍。世居廣寧。康熙三十五年。擢汝南道。勵士習。勸耕農。招墾荒地。飭嚴保甲。盜息民安。聽訟詳慎。鋤強除暴。每冬月。捐俸施粥。全活無算。崇祀名宦。

白璧琛。奉天人。隸正白旗漢軍。康熙五十一年。擢粵之廣南韶道。墨吏望風引遁。江灣向為奸藪。璧琛至任。設法剿滅之。西山猺獍相鬪。單騎歷險。諭降之。歲旱。禱雨輒應。轉荒為豐。民咸頌之。

正紅旗漢軍

審完我。隸正紅旗漢軍。世居遼陽。天命初來歸。事貝勒薩哈璘。以兼通蒙古漢文。任事文館。天聰四年。偕達海招諭永平。從征大凌河。撫諭察哈爾部。以功。授騎都尉。世職。六年。與范文程。馬

國柱等。疏陳伐明之策。

太宗嘉納。尋以好博革世職。閒居數年。順治元年。起用為學士。二年。擢內院大學士。六年。修

太宗實錄。充總裁官。加二等輕車都尉。晉議政大臣。十三年。加少傅。兼太子太保。十五年。致仕。康熙元年。

聖祖念其贊理機務年久。

命擢其子為內院學士。四年卒。

賜祭葬。立碑墓道。諡文毅。雍正八年。

欽定盛京通志

卷七十八

國朝人物十四

十五

詔入祀賢良祠。

郎賽。隸正紅旗漢軍。世居開原鐵嶺。本姓劉。天命元年來歸。四年。

太祖取明撫順。郎賽從。著勲伐。六年。從取明瀋陽。在事有功。崇德七年。漢軍分隸八旗。郎賽始隸正紅旗。尋管佐領。八年。隨征明寧遠。拔中後所。前屯衛。敗遊擊吳良弼等。斬總兵李輔明等。十二月。隨征黑龍江。俘獲甚衆。順治元年。隨入關。破賊將唐通於一片石。嗣追流賊至潼關。率衆前驅。

大破之。二年抵揚州。克其城。尋破江陰等郡。敘功。累加世職至一等輕車都尉。十三年擢爲寧海將軍。鎮守福建。十六年海寇鄭成功率兵犯鎮江。

朝廷遣禁旅至福建。會同郎賽。由廈門進剿。禁旅因風失利。事連郎賽。並逮問削爵。康熙八年事白。復職。十年卒。

吳守進。隸正紅旗漢軍。初事

太祖。以功授叅將。世職。天聰五年七月初設六部。以守

欽定盛京通志

卷七十八

國朝人物十國

六

進爲戶部承政。嗣晉佐領。崇德三年更官制。授戶部左叅政。四年緣事革世職。六年隨圍錦州。以巨礮克塔山四臺。斬馘甚衆。七年擢都統。敗明松山杏山兵。復擊明呂翁山兵。敗之。又追敵入杏山。拔其城。順治元年從平山西。攻太原。克之。二年南征。敗明太監高起潛軍於洋子江。獲其船艦。從攻揚州。嘉興及江陰。皆有功。四年累加世職至一等叅領。充定西將軍。五年卒。子國柄。國正。皆以功名顯。

吳世俊。隸正紅旗漢軍。世居開原。初以佐領兼
叅領。崇德五年。大軍圍明錦州。世俊發巨礮。克
取馬家湖臺。六年。復圍錦州。偕都統金礪。敗明
兵於呂翁山口。七年。攻塔山。杏山。毀其城。八年。
隨鄭親王濟爾哈朗攻寧遠。克前屯衛。中後所。
二城。順治元年。隨都統葉臣。招撫山西。時流賊
李自成遁陝西。其僞伯陳永福。猶據太原。世俊
與諸將攻克其城。山西既定。還兵擊鮑家莊賊
殲之。復隨英親王阿濟格。追勦自成于陝西。自
成遁走湖廣。三年。隨端重親王博洛。定浙江。敗
僞閣部朱大典于金華。破其城。大典自焚死。餘
黨悉平。是年擢都察院左副都御史。六年。授正
紅旗漢軍副都統。屢以功敘。復三遇

恩詔。晉爵至三等男。十年。以疾致仕。十八年。卒。
賜祭葬如例。子延祚襲。

王國光。隸正紅旗漢軍。天命初。隨父一屏來歸。
年十四。勇敢善戰。初任佐領。兼戶部理事官。崇
德中。累遷副都統。兼戶部叅政。八年。隨鄭親王

濟爾哈朗攻寧遠。克前屯衛中後所二城。順治元年。改六部叅政曰侍郎。國光仍任戶部。三年。隨定西大將軍和洛會駐防西安。擊敗興安賊孫守法。胡向宸。又敗其黨歐文炳等。進搗賊巢。拔之。五年。擢都統。六年。隨英親王阿濟格征大同。叛鎮姜瓖。攻克左衛朔州。汾州。太谷。四城。十年。隨定遠大將軍貝勒屯齊征湖廣。擊敗僞晉王李定國於永州。又敗僞秦王孫可望于岔路口。多所斬獲。十二年。海賊鄭成功。張名振犯浙。江。偕寧海大將軍伊勒德往征之。敗其衆于舟山。成功等遁入海。十三年。授兩廣總督。加太子太保。國光廉明果斷。時西逆未靖。土寇充斥。國光嚴詰盜賊。立連坐保甲承審之法。十五年。以疾還京。十八年。授鎮海將軍。駐防潮州。康熙三年。會平南王尚可喜。合兵勦碣石叛將蘇利。進師燈籠山。蘇利乘我軍未成列。率衆萬餘。突來搏戰。我軍左右夾擊。賊衆潰遁。追薄碣石衛城。四面環攻。拔之。擒斬蘇利。及僞總兵陳英。僞副

將李慧等。餘黨竄匿山谷。國光督兵搜捕之。僞總兵鄭盛窮蹙自縊死。賊遂平。五年。還京。復任都統。先後敘功。復遇

恩詔。晉爵一等男。八年。以年老致仕。九年卒。

賜祭葬如例。諡襄壯。

王國詔。國光弟。天聰四年。大軍征明。國詔年十六。卽從征。克永平。五年。從征大凌河。崇德元年。從征朝鮮。攻納摩山。被重創。得賞敘。八年。從攻明前屯衛。被創。順治元年。從征山西。克潞安。追流寇至湖廣。三年。隨征湖南。有功。六年。征大同。叛鎮姜瓖。取朔州。敘功。授佐領。累陞至都統。康熙十三年。乞休。逆藩吳三桂反。國詔隨征。至湖廣。以疾卒。

賜祭葬加典禮。

李國英。奉天人。隸正紅旗漢軍。順治三年。從肅親王豪格定蜀。殲張獻忠。大軍凱旋。留國英鎮保順間。剿平餘賊。代王遵坦爲巡撫。治兵閩中。軍旅之後。饑疫頻仍。國英勸農桑。備戰守。禮賢

興學士民始復業。五年賊黨譚洪犯保寧。擊敗之。王命臣等據順慶。國英分兵三路進殲其衆。追抵潼川。遂定龍安。綿達等州縣。六年擒斬謝光祖等。九年孫可望劉文秀逼閬中。漢沔震動。國英擊破之。十四年以兵部尙書總督川陝。大興屯田。以牛種數萬給墾者。軍儲以足。駐節所在。與士卒同甘苦。俸糈所入盡供餉士用。康熙元年奉

詔帥湖廣陝西河南四川四省兵會剿茅麓山賊李來

欽定盛京通志

卷七十八

國朝人物十四

三

亨。袁宗第等。國英師次夔府。伐榛莽。開道以進。遂奪羊耳山。敗宗第於茶園坪。追及巫山。據其城。宗第又合郝永忠。劉體純。引衆數萬來攻。我兵出戰。體純潰。自殺。乘勝追至黃草坪。永忠宗第以次授首。遂進兵圍來亨於茅麓山。來亨窮。感焚妻子。自經死。寇孽悉平。國英鎮蜀。凡二十有一年。以勞卒于官。

賜祭葬。諡勤襄。追敘剿賊功。晉二等男。雍正十年入祀

賢良祠。

線國安遼東人隸正紅旗漢軍。崇德元年。隨孔有德航海歸誠。從征海外各島。及克服朝鮮。皆在事有功。順治元年。隨大軍入關。追勦流賊李自成於潼關。破金溝寨。復從征江南。克揚州。以兵先渡揚子江。克江陰。四年。隨征湖南。取衡山。六年。授總兵官。復隨攻湖南。多所擒獲。招安反側官兵六七萬人。隨進取廣西之桂林柳州。功最。遂鎮南寧。七年。李定國犯桂林。提師赴援。定國遁去。九年。授提督。十年。李定國擁衆數萬。復犯桂林。國安與陳維新計敗之。遂平定全粵。十一年。復永寧州。敘功。加太子少保。征蠻將軍。順治十二年。敘恢復桂林功。授三等伯。世襲。十五年。隨進取滇黔。戰李定國於涼水。共殺賊五十有餘。復戰於水寨山口。殺賊萬計。十八年。授都統。康熙五年。因老乞休。十四年。卒。國安性廉介。二十餘年。清操如一。人咸以爲難。

蘇宏祖隸正紅旗漢軍。崇德三年。直內院。授啓心郎。八年。考滿。加世職。順治十一年。擢福建興

泉道捍寇修城設倉濟民頗著功績十五年巡撫南贛時巨寇李玉廷劫掠雩都降而復叛者再宏祖遣將擒之戮于市嶺北平與民休息以振興文教爲己任卒祀福建江西名宦。

孫德盛隸正紅旗漢軍初任佐領崇德八年從證明寧遠拔前屯衛中後所順治元年隨南征破流賊平河南江南有功三年加佐領世職四年擢西安副都統加世職至輕車都尉。

孫茂蘭遼陽人隸正紅旗漢軍順治二年任直

隸冀州牧再任霸昌道有惠政四年任山西布政使先是駐防滿兵圈種民地以廢藩土田給之屯丁豪霸者抗不輸租茂蘭重法繩之民不失業或軍民相構訟者質成必準情理九年擢陝西寧夏巡撫尋休致晉人思其德崇祀名宦祠。

徐永順隸正紅旗漢軍世居遼東順治六年任天津道時官兵勦靜海土賊獨天津境內無賊烽火不驚百姓安堵累擢至福建巡撫卒後天

津人思其德。崇祀名宦祠。

吳興祚。清河人。隸正紅旗漢軍。順治十二年。知大寧縣。縣介萬山中。經流寇蹂躪後。四境凋弊。民多轉徙。學宮鞠爲茂草。興祚招民勸墾。興學養士。不再募。民復舊業。寢聞弦誦聲。康熙二年。任無錫令。邑最號繁劇。前任多以罪廢。數十年無遷擢者。興祚至。尙有前令數人。虧空未完。纍纍追繫。興祚慨然曰。彼囊空如洗。拘之何益。寧爲代賠。俾得歸鄉井耳。因設祖席。延數令至。告

以代完。諸公可卽作歸計。前令皆感激去。在任數年。以治行報最。十五年。廷推。特擢福建按察使。以計擒土賊朱統錫。十七年。陞巡撫。加兵部尙書。以兵擊破海賊劉國軒於赤澳等處。焚其船。興祚在任。首薦臬司永寧。于成龍。世號知人。時海氛未靖。興祚留意戎行。識拔將材。總督標下藍理。過誤將刑。興祚知其忠勇可用。緩頰爲開生路。後果以拖腸大戰蒙

聖祖獎賚。優擢顯職。理感舊恩。繪興祚象奉之。姚啓聖

平海壇。與祚與之協謀。取金門廈門。敘功。加騎都尉。又一雲騎尉。世襲。二十年。調兩廣總督。屢上疏言撫粵事宜。皆中利弊。三十一年。授歸化城右翼漢軍副都統。三十六年。從征噶爾丹。卒於軍。興祚素善書。精詩律。所著有宋元聲律選。及史遷句解行世。

許世昌。遼東人。隸正紅旗漢軍。順治十四年。巡按江西。興利除弊。廉平不苛。冤獄多所平反。康熙元年。巡撫福建。先是海寇陸梁。沿海諸郡。製

造戰船火炮。世昌慮部議核減浮價。勢必分派民間。遂具疏力請准銷。又請代完紳衿逋負。免其解部究追。又請蠲順治十三年以前牛角等稅。加價一十餘萬。免民屯久荒田糧六十餘萬。又給遷界窮民牛種。勸令開墾。復捐俸委官于七門及近郊各處。賑粥施藥。以濟遷民之饑疫者。時有萬姓饑病。仁天活命之謠。

劉秉權。遼東人。隸正紅旗漢軍。初授國史院學士。康熙七年。巡撫廣東。懲貪墨。禁苛派。革供應。

風紀肅然。時方巡海展界。秉權。又插男女十六萬有奇。墾田二萬五千餘頃。至復竈丁。而鹽課足。減屯賦。而戍卒安。重師儒。崇禮學。而文風振。皆治績之最著者。歲甲寅。潮州鎮劉進忠叛。秉權親赴潮。帥師斬僞將金統。挫其鋒。勤謀。躬撫。以積勞卒于官。

汪世臣。奉天人。隸正紅旗漢軍。以廕襲世職。順治十六年。隨征湖北。累著戰功。駐防潮州時。蘇利犯順。世臣隨將軍王國光。與賊戰于石井寨。

欽定盛京通志

卷七十八

國朝人物十四

三五

親冒矢石。戰方酣。又以奇兵繞出賊營。勝之。降其餘衆。潮郡悉平。尋擢粵東副都統。在粵三十餘年。訓練嚴明。地方寧輯。以疾終。祀名宦。

王永譽。國光子。康熙二十三年。授河南提督。時河北鎮蔡祿叛。應吳三桂。遣禁旅。剿賊于懷慶。永譽由孟津渡河。爲犄角勢。兵至。擒之。不煩血刃。嚴戢部伍。間里晏然。尋調安慶提督。逆藩耿精忠。遣僞都督宋標等。陷江西饒州。犯徽州。十四年。永譽進師擒宋標。磔之。十七年。改江南提督。

十九年。遷廣東將軍。三十五年。

聖祖親征噶爾丹。永譽統正黃正紅兩旗。由中路進。噶爾丹遁。永譽督兵追躡。偵賊遠竄。乃還。四十二年卒。祀河南名宦。

李芳春。蓋平人。隸正紅旗漢軍。順治五年。知直隸慶雲縣。邑當殘破之餘。芳春年少。賊甚易之。屢出滋擾。芳春乃與協鎮郭天培等。密謀剿捕。前後擒賊等二千餘人。訓練鄉民。皆知守禦。賊相戒不敢入境。

欽定盛京通志

卷七十八

國朝人物十四

三

劉德芳。遼陽人。隸正紅旗漢軍。初任山東東昌守。勤於政事。勸課農桑。優禮齒德。民情向化。值歲旱。德芳步禱輒應。卒至豐稔。康熙四十三年。擢四川按察使。讞決平允。時打箭爐甫定。茶鹽權課壅遏不行。德芳籌畫盡善。歲無停滯。民思其德。嘗葺文翁石室為錦江書院。蜀之人士欣然向學。卒祀山東四川名宦。

孟希舜。奉天人。隸正紅旗漢軍。順治八年。知江南之廣德州。請免州縣地畝溢額銀六千七百

餘兩。歲早勘災。申豁秋糧十分之一。民賴以安。其居官以愛民爲本。一時有杜母之譽。

董宏毅。奉天人。隸正紅旗漢軍。康熙中。知江西奉新縣。時耿精忠煽亂。以兵逼城。宏毅率官兵捍禦。手斬爲內應者。發矢先斃其僞左將軍。生擒六人。賊潰。城賴以全。明年。賊萬餘踞城北獅山。礮石雨下。宏毅殲其前鋒。又斬賊于邑之棉花地。賊衆悉平。邑遭亂後。丁缺田荒。爲繪圖申請。減賦之半。在職四載。勤勞奉公。

王之紀。鄱陽人。隸正紅旗漢軍。康熙十六年。知福建之德化縣。時逆寇初平。瘡痍未起。之紀簡靜鎮撫。不事紛更。清理訟獄。減省興作。政舉民安。及去任。士民攀轅乞留。卒祀名宦。

王毓奇。奉天人。隸正紅旗漢軍。康熙三十二年。知四川之瀘州。除耗羨。嚴保甲。勸耕織。盜賊斂避。民安其業。比戶有豐寧之慶。其歿也。州人祠之。

王臣。隸正紅旗漢軍。父國泰。別見忠節傳。臣以

蔭初任廣東駐防協。康熙三十九年擢湖廣
永州總兵。整飭戎行。無卹士卒。廉介自矢。不受
餽遺。永州頻年遭火。加以大水。四十四年州又
大旱。臣隨時設法。救民無算。尋卒。永人思其德。
崇祀名宦。

欽定盛京通志

卷七十八

國朝人物十四

二十六

欽定盛京通志卷之七十八